

四庫全書

集部

欽定四庫全書

集部

漢魏六朝百三家集卷七十五

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官中書臣陸湘

謄錄監生臣王岑

欽定四庫全書

漢魏六朝百三家集卷七十五

齊王儉集題詞

王仲寶年六歲拜受茅土未三十即位令僕身
尚公主爵享元侯佩刀淮水徵祥已極然早痛
死父中厄天年福造不完非人力也宋齊議禮
家各為說吉凶參會咸稟仲寶即史書所傳可
謂非七志之膏腴乎齊臺佐命褚王並推彥回

風則同朝欽賞若援論古今宣明朝典必仲寶
居前彼雖風流自命欲比安石時論未許抑觀
自古宰相議禮通達漢韋玄成匡衡以後不多
見也褚公貴而善藝徒以別鶴琴曲銀柱琵琶
稱說名士其能則樂官伎弄耳寧望王僕射乎
且二子皆齊貴戚逢迎興運不臣跡同而世尤
惡褚者豈非以羅襪負約石頭偷生直犬豕目
之於仲寶則猶憐其父死非命或有伍胥乞食

之志而不難以國販也

目錄

賦

靈丘竹賦

和竟陵王高松賦

表

諫壞宋明帝紫極殿以材柱起宣陽門表

請解僕射表

又

求解尚書表

議

郊殷議

二郊明堂議

日蝕不廢社祠議

南郡王昭業冠議

公府長史朝服議

又議

帝后諱議

冕旒議

皇后遷祔祭奠議

奠祭設虞議

皇太子妃服議

太子妃建銘旌議

太子迎車駕議

太子妃旒翣議

穆妃朔望設祭議

穆妃詳議

答褚淵難

答王浚問

君母服議

入學釋奠議

褚淵拜錄議

司空掾屬為褚淵服議

司徒府史為褚淵服議

史條例議

奏

諒闇親奉蒸嘗奏

啓

先郊後春啓

請江數還本啓

章

拜儀同三司章

牋

與豫章王嶷牋

書

答陸澄

經義問答

曲禮問答

周易問答

孝經問答

贊

竟陵王山居贊

碑文

太宰文簡褚彥回碑文

連珠

暘連珠

哀策

高帝哀策文

皇太子妃哀策文

詩

侍皇太子釋奠宴

侍太子九日宴玄圃詩

贈徐孝嗣

春日家園

春詩

其二

春夕

後園餞從兄豫章

失題

南郊樂歌

高德宣烈樂

太廟樂歌

高德宣烈樂

穆德凱容樂

明德凱容樂

齊白紵辭

漢魏六朝百三家集卷七十五目錄

欽定四庫全書

漢魏六朝百三家集卷七十五

明 張溥 輯

齊王儉集

賦

靈丘竹賦

靈丘深沈蔓竹凝陰神根合拱楨榦百尋振芳條乎崑
岳敷綠采於蒿岑沿淮海而蔚映帶沮漳而蕭森至東

南而擅美在淇衛而流音方靈壽而均茂儀茵桂而成
林若乃青春受謝九野舒榮綠蘋齊葉白芷抽萌蘗葱
蔥而特秀篠擢影而垂英霜皦鏡於原隰木哀疏於郊
阡翠葉與飛雪爭采貞柯與曾冰競鮮

和竟陵王高松賦

山有喬松峻極青葱既抽榮於岱嶽亦擢穎於荆峯若
乃朔窮於紀歲亦莫止隆冰峩峩飛雪千里嗟萬有之
必哀獨貞華之無已積皓霰而爭光延微颺而響起

表

諫壞宋明帝紫極殿以材柱起宣陽門表

臣聞德者身之基儉者德之興春臺將立晉卿秉議北
宮肇構漢臣盡規彼二君者或列國常侯或守文中主
尚使諫諍在義即悅況陛下聖哲應期臣等職司隆重
敢藉前誥竊乃有心陛下登庸宰物節省之教既昭龍
袞璇極簡約之訓彌遠乾華外構采椽不斷紫極故材
為宣陽門臣等未譬也夫移心疾於股肱非良醫之美

畏影迹而馳騖豈靜處之方且又三農在日千畝咸事
輟望歲之勤興土木之役非所以宣昭大猷光示遐邇
若以門居宮南重陽所屬年月稍久漸就淪胥自可隨
宜修理而合度改作之煩於是乎息所啓謬合請付外
施行

請解僕射表

臣遠尋終古近察身事邀恩幸藉未見其倫何者子房
之遇漢后公達之逢魏君史籍以為美談君子稱其高

義二臣才堪王佐理非曲私兩主專仗威武有傷寬裕
豈與庸流之人憑含宏之澤者同年而語哉預在有心
胡寧無感如使傾宗殞元有益塵露猶當畢志驅馳仰
訓萬一豈容稍在形飾以徇常事九流任要風猷所先
玉石朱紫由斯而定臣亦不謂文案之間都無微解至
於品裁臧否特所未聞雖存自勗識不副意無竊而任
彼此俱壅專情本官庶幾髣髴且前代掌選未必俱在
代來何為於今非臣不可傾心奉國匪復退讓之與預

同休戚寧侯位任為親陛下若不以此理賜期豈仰望
於殊眷頻冒嚴威分甘尤戾

又

待臣於常均之外眄臣於代僚之右親承其章乘非其
器霸府方隆超居元佐國朝草昧參贊百揆

求解尚書表

臣比年辭選具簡天朝款言彰於侍接丹誠布於朝野
物議不以為非聖心未垂矜納臣聞智慧不如明時求

之微躬實允斯義妄庸之人沈浮無取命偶休泰遂踐
康衢秋葉辭條不假風飈之力太陽躋景無俟螢燭之
暉晦往明來五德遼運聖不獨治八元亮采臣逢其時
而叨其位嘗總端右承管銓衡事涉兩朝歲綿一紀盛
年已老孫孺巾冠人物徂遷逝者將半三考無聞九流
寂寞能官之詠綴響於當時大車之刺方興以來日若
夫珥貂衣袞之貴四輔六教之華誠知非服職務差簡
端揆雖重猶可勉勵至於品藻之任尤懼其阻夙宵罄

竭屢試無庸歲月之久近世罕比非惟悔吝在身故乃
惟塵及國方今多士盈朝羣才競爽選衆而授古亦何
人冒陳微翰必希天照至敬無文不敢煩黷

議

郊殷議

南齊高帝建元元年七月有司奏郊殷之禮
未詳郊在何年復以何祖配郊殷復在何時
未郊得先殷與不明堂亦應與郊同年而祭
不若應祭者復有配與無配不祀者堂殿職
僚毀置云何八座丞郎通闕博士儀曹郎中
裴昭明儀曹郎中孔暹議今年七月宜殷祀

來年正月宜南郊明堂並祭而無配殿中郎
司馬憲議南郊無配饗祠如舊明堂無配宜
應廢祀其股祀同用今年十月右僕射王儉
議詔可明堂可更計有司又奏明堂尋禮無
明文唯以孝經為正竊尋設祀之意蓋謂文
王有配則祭無配則止愚謂既配上帝則以
帝為主今雖無配不應闕祀徐邈近代碩儒
每所折衷其云郊為天壇則堂非文廟此實
明據內外百司立議已定如更詢訪終無異
說傍儒依史竭其管見既聖旨惟疑羣下未
敢詳廢置之宜仰
由天鑒詔依舊

案禮記王制天子先祫後時祭諸侯先時祭後祫春秋
魯僖二年祫明年春禘自此以後五年再殷禮緯稽命

徵曰三年一祫五年一禘經記所論禘祫與時祭其言詳矣初不以先殷後郊為嫌至於郊配之重事由王迹是故杜林議云漢業特起不因緣堯宜以高帝配天魏高堂隆議以舜配天蔣濟云漢時奏議謂堯已禪舜不得為漢祖舜亦已禪禹不得為魏之祖今宜以武皇帝配天晉宋因循即為前式又案禮及孝經援神契並云明堂有五室天子每月於其室聽朔布教祭五帝之神配以有功德之君大戴禮記曰明堂者所以明諸侯尊

卑也許慎五經異義曰布政之宮故稱明堂明堂盛貌也周官匠人職稱明堂有五室鄭玄云周人明堂五室帝一室也初不聞有文王之寢鄭志趙商問云說者謂天子廟制如明堂是為明堂即文廟耶鄭答曰明堂主祭上帝以文王配耳猶如郊天以后稷配也素孝尼云明堂法天之宮本祭天帝而以文王配配其父於天位則可牽天帝而就人鬼則非義也秦元十三年孫耆之議稱郊以祀天故配之以后稷明堂以祀帝故配之以

文王由斯言之郊為皇天之位明堂即上帝之廟徐邈謂配之為言必有神主郊為天壇則堂非文廟史記云趙綰王臧欲立明堂于時亦未有郊配漢又祀汾陰五時即是五帝之祭亦未有郊配議者或謂南郊之日已旅上帝若又以無配而特祀明堂則一日再祭於義為黷案古者郊本不共日蔡邕獨斷曰祠南郊祀畢次北郊又次明堂高廟世祖廟謂之五供馬融云郊天之祀咸以夏正五氣用事有休有王各以其時兆以方郊四

時合歲功作相成亦以此月總旅明堂是則南郊明堂
各日之證也近代從省故與郊同日猶無煩黷之疑何
者其為祭雖同所以致祭則異孔晁云言五帝佐天化
育故有從祀之禮旅上帝是也至於四郊明堂則是本
祀之所譬有功臣從饗豈復廢其私廟且明堂有配之
時南郊亦旅上帝此則不疑於共日今何故致嫌於同
辰又禮記天子祭天地四方山川五祀歲徧尚書堯典
咸秩無文詩云昭事上帝聿懷多福據此諸義四方山

川猶必享祀五帝大神義不可畧魏文帝黃初二年正月郊天地明帝太和元年正月以武皇帝配天文皇帝配上帝然則黃初中南郊明堂皆無配也又郊日及牲色異議紛然郊特牲云郊之用辛周之始郊也盧植云辛之為言自新絜也鄭玄云用辛日者為人當齋戒自新絜也漢魏以來或丁或巳而用辛常多考之典據辛日為允郊特牲又云郊牲幣宜以正色繆襲據祭法云天地駢犢周家所尚魏以建丑為正牲宜尚白白虎通

云三王祭一用夏正所以然者夏正得天之數也魏用
異朔故牲色不同今大齊受命建寅創歷郊廟用牲一
依晉宋謂宜以今年十月殷祀宗廟自此以後五年再
殷來年正月上辛有事南郊宜以共日還祭明堂又用
次辛饗祀北郊而並無配犧牲之色率有舊章

二郊明堂議

四年世祖即位其秋有司奏尋前代副位或
仍前郊年或別始晉宋以來未有畫一今年
正月己郊未審明年應南北二郊祀明堂與
不依舊通闕八座丞郎博士議尚書令王儉

議尚書領國子祭酒張緒
等十七人並同儉議詔可

案秦為諸侯雜祀諸時始皇并天下未有定祠漢高受
命因雜四時而起北時始祠五帝未定郊丘文帝六年
新垣平議初起渭陽五帝廟武帝初至雍郊見五時後
常三歲一郊祠雍元鼎四年始立后土祠於汾陰明年
立太一祠於甘泉自是以後二歲一郊與雍更祠成帝
初即位丞相匡衡於長安定南北郊哀平之際又復甘
泉汾陰祠平帝元始五年王莽奏依匡衡議還復長安

南北二郊光武建武二年定郊祀兆於洛陽魏晉因循率由漢典雖時或參差而類多間歲至於嗣位之君參差不一宜有定制檢晉明帝太寧五年南郊其年九月崩成帝即位明年改元即郊簡文咸安二年南郊其年七月崩孝武即位明年改元亦郊宋元嘉三十年正月南郊其年二月崩孝武嗣位明年改元亦郊此則二代明例差可依放謂明年正月宜饗祀二郊虔祭明堂自茲厥後依舊間歲

日蝕不廢社祠議

永明元年十二月有司奏今月三日臘祠太社稷一日令朔日蝕既在致齋內未審於社祠無疑不曹檢未有前准尚書令王儉議詔可

禮記曾子問天子嘗禘郊社五禮之祭簠簋既陳唯大喪乃廢至於常祭之日火日蝕則停尋伐鼓用牲由來尚矣而簠簋初陳問所不及據此而言致齋初日仍值薄蝕則不應廢祭又初平四年士孫瑞議以日蝕廢社而不廢郊朝議從之三者父天親地郊社不殊此則前

准謂不宜廢

南郡王昭業冠議

永明五年十月有司奏南郡王昭業冠求儀注未有前准尚書令王儉議僕射王真等十

四人議並同並撰立贊冠醢酒二辭詔可

皇孫冠事歷代所無禮雖有嫡子嫡孫然而地居正體下及五世今南郡王體自儲暉實惟國裔元服之典宜異列蕃案士冠禮主人元冠朝服賓加其冠贊者結纓鄭玄云主人冠者之父兄也尋其言父及兄則明祖在

父不為主也大戴禮記公冠篇云公冠自為主四加玄
冕以卿為賓此則繼體之君及帝之庶子不得稱子者
也小戴禮記冠義云冠於阼以著代也醮於客位三加
彌尊加有成也注稱嫡子冠於阼庶子冠於房記又云
古者重冠故行之于廟所以自卑而尊先祖也據此而
言彌與鄭注儀禮相會是故中朝以來太子冠則皇帝
臨軒司徒加冠光祿贊冠諸王則郎中加冠中尉贊冠
今同於儲皇則重依於諸王則輕又春秋之義不以父

命辭王父命禮父在斯為子君在斯為臣皇太子居臣
子之節無專用之道南郡雖處蕃國非支庶之列宜稟
天朝之命微申冠阼之禮晉武帝詔稱漢魏遣使冠諸
王非古正典此蓋謂庶子封王合依公冠自主之義至
於國之長孫遣使惟允宜使太常持節加冠大鴻臚為
贊醢酒之儀亦歸二卿祝醢之辭附准經記別更撰立
不依蕃國常體國官陪位拜賀自依舊章其日内外二
品清官以上詣止車集賀並詣東宮南門通牋別日上

禮官臣亦詣門稱賀如上臺之儀既冠之後尅日謁廟以宏尊祖之義此既大典宜通關八座丞郎並下二學詳議

公府長史朝服議

後宋廢帝元徽四年上
議為沈侯之所駭遂寢

春秋國語云貌者情之華服者心之文巖廊盛禮衣冠為大是故軍國異容內外殊序而自頃承用每有乖違府職掌人教四方是則臣居毘佐志在當官永言先典

載懷夕惕業晉令公府長史官品第六銅印墨綬朝服
進賢兩梁冠掾屬官品第七朝服進賢一梁冠晉官表
注亦與令同而今長史掾屬但著朱服而已此則公違
明文積習成謬謂宜依舊制長史兩梁冠掾屬一梁冠
並同備朝服中單韋舄率由舊章若所上蒙允並請班
司徒二府及諸儀同三府通為永準又尋舊事司徒公
府領步兵者職僚悉同降朝不領兵者主簿祭酒中單
韋舄並備令史以下唯著玄衣今府既開公謹遵此制

其或有署臺位者玄服為宜按令稱謹有兼官皆從重
官之例尋內官為重其署臺位者悉宜著位之服不在
玄服之例若署諸卿寺位兼府職者雖三品而卿寺為
卑則宜依公府元衣之制服章事重禮儀所先請臺詳
服

又議

自項服章多闕有違前準近議依今文被報不宜改草
又稱左丞劉議按今文凡有朝服今多闕亡然則文存

服損非唯鉉佐用舍既久即為舊章如下旨伏尋皇宋
受終每因晉舊制律令條章同規在昔若事有宜必合
懲改則當上闕詔書下由朝議縣諸日月垂則後昆豈
得因外府之乖謬以為盛宋之興典用晉氏之律令而
謂其儀為積法哉順違從失非所望於高議申明舊典
何改革之可論又左丞引令史之闕服以為鉉佐之明
比夫名位不同禮數異等令史從損或有權宜達官簡
畧為失彌重又主簿祭酒備服於王庭長史掾屬朱衣

以就列於是倫比自成矛盾此而可忍孰不可安將引
令以遵舊臺據失以為例研詳符旨良所未譬當官而
行何強之有制令昭然守以無貳

帝后諱議

建元元年太常上朝
堂諱訓僕射王儉議

后諱依舊不立訓禮天子諸侯諱羣祖臣隸既有從敬
之義宜為太常府君諱至於朝堂榜題本施至極既迨
尊所不及禮降於在三晉之京兆宋之東安不列榜題

孫毓議稱京兆列在正廟臣下應諱而不上榜宋初博
士司馬道敬議東安府君諱宜上榜何承天執不同即
為明據其有人名地名犯太常府君及帝后諱者皆改
宣帝諱同二名不偏諱所以改承明門為北掖以榜有
之字與承並東宮承華門亦改為宣華云

冕旒議

依漢三公服山龍九章卿華螽七章

皇后遷祔祭奠議

建元四年高帝山陵昭皇后應遭祔祠部疑有祖祭及遣啟諸奠九飯之儀不左僕射王

儉議從之

奠如大歛賀循云從墓之墓皆設奠如將葬廟朝之禮
范甯云將窆而奠雖不稱為祖而不得無祭

奠墓設虞議

有司又奏昭皇后神主在廟今遣祔葬葬有虞以安神神既已處廟改葬出靈豈應虞祭
鄭注改葬云從廟之廟禮宜同從墓之墓事何容異前代謂應無虞左僕射王儉議從之

范甯云葬必有輓車若不為其歸神將安舍世中改葬

即墓所施靈設祭何得不祭而毀也賀循云既窆設奠於墓以終其事雖非正虞亦粗相似晉氏修復五陵宋朝敬后改葬皆有虞今設虞非疑

皇太子妃服議

建元二年皇太子妃薨前宮臣疑所服左僕射王儉議從之

禮記文王世子父在斯為子君在斯為臣且漢魏以來宮僚充備臣隸之節具體在三昔庾翼妻喪王允膝宏謂府吏宜有小君之服況臣節之重耶宜依禮為舊君

妻齊衰三月居官之身並合屬假朝晡臨哭恚繫東宮
今臣之未從官在遠者於居官之所屬寧二日半仍行
喪成服遺戕表不得赴

太子妃建銘旌議

太子妃斬草乘黃議
建銘旌僕射王儉議

禮既塗棺祝取銘置於殯東大斂畢便應建於西階之
東

太子迎車駕議

穆妃薨成服日車駕出臨喪朝議
疑太子應出門迎左僕射王儉議

尋禮記服問君所主夫人妻太子嫡婦言國君為此三
人為主喪也今鑾輿臨降自以主喪而至雖因事撫慰
義不在吊南郡以下不應出門奉迎但尊極所臨禮有
變草權去杖經移立戶外足表情敬無煩止哭皇太子
既一宮之主自應以車駕幸宮依常奉候既當成服之
日吉凶不相干宜以哀幘行事望拜止哭率繇舊章尊
駕不以臨弔奉迎則惟常體求之情禮如為可安

太子妃旒翬議

宋大明二年太子妃薨建九旒有司又議斬草日建旒與不若建旒應幾旒及畫龍升降云何又用幾翬僕射王儉議從之

旒本是命服無關於凶事今公卿以下平存不能備禮故在凶乃建耳東宮秩同上公九命之儀妃與儲君一體義不容異無緣未同常例別立凶旒大明舊事是不經詳議率爾便行耳今宜考以禮典不得效尤從失吉部伍自有桁輅凶部別有銘旌若復立旒復置何處翬

自用八

穆妃朔望設祭議

有司奏穆妃卒哭後靈還在道遇朔望當須設祭否王儉議時議從之

既虞卒哭祭之於廟本是祭序昭穆耳未全同卒吉四時之祭也所以有朔望殷事蕃國不行權制宋江夏王妃卒哭以後朔望設祭帝室既以卒哭除喪無緣方有朔望之祭靈筵雖未升廟堂而舫中即成行廟猶如桓玄及宋高祖長沙臨川二國並有移廟之禮豈復謂靈

筵在途便設殷事耶推此而言朔望不復俟祭宋懿后時舊事不及此並可知

穆妃詳議

建元三年有司奏皇太子穆妃以去年七月薨其年閏九月數閏為應以閏附正月若用月數數閏者南郡王兄弟便應以此四月晦小祥至於祥月不為有疑不左僕射王倫議

三百六旬尚書明義文公納幣春秋致譏穀梁云積分而成月公羊云天無是月雖然左氏謂告朔為得禮是故先儒咸謂三年暮喪歲數沒閏大功以下月數數閏

夫閏者蓋是年之餘日而月之異朔所以吳商云舍閏以正朞允協情理今杖朞之喪雖以十月而小祥至於祥縞必須周歲凡厭屈之禮要取象正服祥縞相去二月厭降小祥亦以則之又且求之名義則小祥本以年限考之倫例則相去必應二朔今以厭屈而先祥不得謂此事之非期事既同條情無異貫沒閏之理固在言先設令祥在此晦則去縞三月依附准例益復為礙謂應須五月晦乃祥此國之大典宜共精詳並通關八座

丞郎研盡異同

答褚淵難

尚書令褚淵難儉議曰厥屈之典由所尊奪情故祥縞備制而年月不申今以十一月而祥從期可知既計以月數則應數閏以成典若猶舍之何以異於縞制疑者正以祥之當閏月數相縣積分餘閏應象所宏計月者數閏故有餘月計年者苞舍故致盈積稱理從制有何不可儉答淵難隨事解釋祠部郎中王珪之議謂喪以閏施功衰以下小祥值閏則畧而不言今雖厥祥名猶存異於餘服計月為數屈追慕之心以逮為通日既餘分月非正朔舍而全制於情唯允僕射儉議理據詳博謹所附同今司徒淵始雖疑難再經往

反未同儉議依舊八座丞郎通常博議為允以
來年五月晦小祥其祥禪自依常限奏御班下

內外
詔可

舍閏之議通儒所難但祥本應期屈而不遂語事則名
體俱存論哀則情無異迹雖數月義實計年閏是年之
歸餘故宜總而苞之期而兩祥緣尊故屈祥則沒閏象
年所申屈甲兼著二途具舉經紀之旨其在茲乎如使
五月小祥六月乃閏則祥之去縞事成二月是為十一
月以象前期二朔以放後歲名有區域不得相參魯襄

二十八年十二月乙未楚子卒唯書上月初不言閏此
又附上之明義也鄭射王賀唯云期則沒閏初不復區
別杖期之中祥將謂不俟言矣成休甫云大祥後禫有
閏別數之明杖期之祥不得方於綬縞之末即恩如彼
就例如此

答王遂問

皇太子穆妃服尚書右丞兼著作郎王遂問
左僕射王儉中軍南郡王小祥應待聞喜否
穆妃七月二十四日薨聞喜公八月發哀計
十一月之限應在六月南郡王為當同取六

月則大祥復申一月應用八月非復正月在
存親之義若各自為祥廬壘相問玄素相糅
未審當有此疑不司徒褚淵等二十
人並同儉議為允請以為永制詔可

送往有已復生有節罔極非服制所申祥縞明示終之
斷相待之義經記無聞世人多以廬室衰麻不宜有異
故相去一二月者或曰以俱除此所謂任情徑行未達禮
旨昔撰喪記已嘗言之遠還之人自有為而未祭在家
之子立何辭以不變禮有除喪而歸者此則經記之遺
文不待之明據假使應待則相去彌年亦宜必待乃為

衰經永服以窮生吉蠲長絕於宗廟斯不可矣苟曰非
宜則旬月之間亦不容申何者禮有倫序義無徒設今
遠則不待近不相須禮例既乖即心無取若疑兄弟同
居吉凶乖雜則古有異宮之義設無異宮則遠還之子
自應開立別門以終喪事靈筵祭奠同在家之人再朞
而毀所以然者奔喪禮云為位不奠鄭玄云以其精神
不存乎此也聞哀不時實緣在遠為位不奠益有可安
此自有為而然不關嫡庶庶子在家亦不待嫡矣而況

儲妃正體王室中軍長嫡之重天朝又行權制進退彌復非疑謂不應相待中軍祥縞之日聞喜致哀而已不受弔慰及至忌辰變除昆弟亦宜相就寫情而不對客此國之大典宜通關八座丞郎共盡同議然後奏御

君母服議

建元三年太子穆妃薨南郡王聞喜公國臣疑制君母服儉又議

禮庶人為國君齊衰先儒云庶人在官若府史之屬是也又諸侯之大夫妻為夫人服總衰七月以此輕微疎遠

故不得盡禮今皇孫自是蕃國之王公太子穆妃是天朝之嫡婦宮臣得申小君之禮國官豈敢為夫人之敬當單衣白帟素帶哭於中門外每臨輒入與宮官同

入學釋奠議

齊武帝永明三年春詔立學創立堂宇召公卿子弟下及貧外郎之胥凡學生二百人其年秋中悉集有司奏宋元嘉舊事學生到先釋奠先聖先師禮又有釋菜未詳今當行何禮用何樂及禮器尚書令王倫上議其冬皇太子講孝經親臨釋奠車駕幸聽

周禮春入學釋菜合舞記云始教皮弁祭菜示敬道也

又云始入學必祭先聖先師中朝以來釋菜禮廢今之所行釋奠而已金石俎豆皆無明文方之七廟則輕比之五禮則重陸納車屑謂宣尼廟宜依亭侯之爵范甯欲依周公之廟用王者儀范宣謂當其為師則不臣之釋奠日備帝王禮樂此則車陸失於過輕二范傷於太重喻希云若至王者自設禮樂則肆賞於至敬之所若欲嘉美先師則所況非備尋其此說守附情理皇朝屈尊宏教待以師資引同上公即事惟允元嘉立學裴松

之議應舞六佾以郊樂未備故權奏登歌今金石已備
宜設軒懸之樂六佾之舞牲牢器用悉依上公

褚淵拜錄議

高帝崩遺詔以淵為錄尚書事江左以來無
單拜錄者有司疑立優策尚書令王儉議從
之

見居本官別拜錄應有策書而舊事不載中朝以來三
公王侯則優策並設官品第二策而不優優者褒美策者兼
明尚書職居天官委寄政化之本故尚書令品雖第三

拜必有策錄尚書品秩不見而總任彌重前代多與本官同拜故不別有策即事緣情不容均之凡僚宜有策書用申隆寄既異王侯不假優丈

司空掾屬為褚淵服議

淵改授司空薨掾屬以淵未拜疑應為吏敬不王儉議

依禮婦在塗聞夫家喪改服而入今掾屬雖未服勤而吏節稟於天朝宜申禮敬

司徒府史為褚淵服議

司徒府史又以淵既解職而未恭
後授府判應上服與不儉又議

依中朝士孫德祖從樂陵遷為陳留未入境樂陵郡吏
依見君之服陳留迎吏依娶女有吉日齊衰弔司徒府
宜依官制服

史條例議

建元二年初置史官檀超與驃騎記室江淹
掌史職上表立條例間元紀號不取宋年封
爵各詳本傳無假年表立十志律應禮樂天
文五行郊祀刑法藝文依班固朝會輿服蔡
邕司馬彪州郡依徐爰百官依范曄合州郡
班固五星載天文日蝕載五行改日蝕入天

文志以建元為始帝女體自皇宗立傳以備甥舅之重又立處士列女傳詔內外詳議僕

射王儉議詔日月災
隸天文餘如儉議

金粟之重八政所先食貨通則國富民實宜加編錄以
崇務本朝會志前史不書蔡邕稱先師胡廣說漢舊儀
此乃伯喈一家之曲碎小儀無煩錄宜立食貨省朝會
洪範九疇一曰五行五行之本先乎水火之精是為日
月五行之宗也今宜憲章前軌無所改草又立帝女傳
亦非淺識所安若有高德異行自當載在列女若止於

常美則仍舊不書

奏

諒闇親奉蒸嘗奏

南齊高帝建元四年尚書令王
儉採晉中朝諒闇議奏從之

權典既行喪禮斯奪事興漢世而源由甚遠殷宗諒闇
非有服之稱周王即吉唯宴樂為譏春秋之義嗣君踰
年即位卿出並聘踐修舊好又云諸侯即位小國聘焉
以繼好結信謀事補闕禮之大者至於諒闇之內而圖

婚三年未終而吉禘齊歸之喪不廢蒐杞公之卒不徹樂皆致譏貶以明鑒戒自斯而談朝聘蒸嘗之典卒哭而備行婚禘蒐樂之事三載而後舉通塞興廢各有自然又案大戴禮記及孔子家語並稱武王崩成王嗣位明年六月既葬周公冠成王而朝于祖以見諸侯命祝雍作頌襄十五年十一月晉侯周卒十六年正月葬晉悼公平公既即位改服修官烝于曲沃禮記曾子問孔子曰天子崩國君薨則取羣廟之主而藏諸祖廟禮乎

卒哭成事而後主各反其廟春秋左氏傳凡君卒哭而祔祔而後特祀於主蒸嘗禘於廟先儒云特祀於主者特以喪禮奉新亡者至於寢則不同於古蒸嘗禘於廟者卒哭成事羣廟之主各返其廟則四時之祭皆即吉也三年喪畢吉禘於廟躋羣主以定新主也凡此諸議悉著在經詁昭乎方冊所以晉宋因循同規前典卒哭公除親奉蒸嘗率禮無違因心允協爰至秦豫元年禮官立議不宜親奉乃引三年之制自天子達又據王制

稱喪三年不祭唯祭天地社稷越紼而行事曾不知自
天子達本在至情既葬釋除事以權奪委哀襲衾孝享
宜申越紼之旨事施未葬卒哭之後何紼可越復依范
宣之難杜預譙周之論士祭竝非明據晉武在喪每欲
存寧戚之懷不全依諒闇之典至於四時蒸嘗蓋以哀
疾未堪非便損改舊式江左以來通儒碩學所應多矣
守而弗革義豈徒然又宜即心而言公卿大夫則負宸
親臨三元告始則朝會萬國雖金石輟響而簔簏充庭

情深於恒哀而跡降於凡制豈曰能安國家故也宗廟
蒸嘗孝敬所先寧容吉事備行斯典獨廢就令必宜廢
祭則應三年永闕乃復同之他故有司攝禮進退二年
彌乖典衷謂宜依舊親奉

啓

先郊後春啓

南齊武帝永明元年當南郊而立春在
郊後世祖欲遷郊尚書令王儉啓從之

案禮記郊特牲云郊之祭也迎長日之至也大報天而

主日也易說三王之郊一用夏正盧植云夏正在冬至
後傳曰啓蟄而郊此之謂也然則圜丘與郊各自行不
相害也鄭元云建寅之月晝夜分而日長矣王肅曰周
以冬祭天於圜丘以正月又祭天以祈穀祭法稱燔柴
太壇則圜丘也春秋傳曰啓蟄而郊則祈穀也謹尋禮
傳二文各有其義盧王兩說有若合符中朝省二丘以
並二郊即今之郊禮義在報天事兼祈穀既不全以祈
農何必俟夫啓蟄史官唯見傳義未達禮旨又尋景平

元年正月三日辛丑南郊其月十一日立春元嘉十六年正月六日辛未南郊其月八日立春此復是近世明例不以先郊後春為嫌若或以元日合朔為礙者則晉成帝咸康元年正月一日加元服二日親祠南郊元服之重百僚備列雖在致齋行之不疑今齋內合朔此即前准若聖心過恭寧在嚴潔合朔之日散官備防非預齋之限者於止車門外別立幔省若日色有異則列於省前望實為允謂無煩遷日

請江敷還本啓

初宋明帝勅敷出繼從叔慈為從祖淳後于是僕射王儉啓尚書參議謂問世立後禮無其文荀顗無子立孫墜禮之始何期又立此論義無所據於是敷還本家

禮無後小宗之文近世緣情皆繇父祖之命未有既孤之後出繼宗族也雖復臣子一揆而義非天屬江忠簡胤嗣所寄唯敷一人傍無眷屬敷宜還本若不欲江慈絕後可以敷小兒繼慈為孫

章

拜儀同三司章

臣聞日中則昃盈虛之定分器滿必傾往事之恒理遂
乃班同衮章燹和台曜外參論道內總百司物議惟塵
自識非據

牋

與豫章王嶷牋

舊楚蕭條仍歲多故荒民散亡

南史作政
荒人散

寔須緝理公

臨蒞甫爾英風惟穆江漢來蘇八荒慕義

八荒一作八州

自庾

亮以來荊州

一作楚

無復此美

南史無美字

政古人云期月有

成而公旬日成化

一作致治

豈不休哉

書

答陸澄

易體微遠實貫羣籍施孟異聞周韓殊旨豈可專據小

王便為該備

一作輔

依舊存鄭高同來說元凱傳注超邁

前儒若不列學官其可廢矣賈氏注經世所罕習穀梁

小書無俟兩注存糜畧范率由舊式凡此諸義並同雅

論疑孝經非鄭所注僕以此書明百行之首實人倫所
先七畧藝文並陳之六藝不與蒼頡凡將之流也鄭注
虛實前代不嫌意謂可安仍舊立置

經義問答

曲禮問答

永明五年冬太子臨國學親臨策試諸生於坐問少傅
王儉曰曲禮云無不敬尋下之奉上可以盡禮上之接
下慈而非敬今總同敬名將不為昧儉曰鄭玄云禮主

于敬便當是尊卑所同太子曰若如來通則忠惠可以
一名孝慈不須別稱儉曰尊卑號稱不可悉同愛敬之
名有時相次忠惠之異誠以聖旨孝慈互舉竊有微據
禮云不勝喪比於不慈不孝此則其義太子曰資敬事
君資愛事親兼此二塗唯在一極今乃移敬接下豈復
在三之義儉曰資敬奉君必同至極移敬逮下不慢而已太
子曰敬名雖同深淺既異而文無差別彌復增疑儉曰
繁文不可備設畧言深淺已見傳云不忘恭敬民之主

也書云奉先思孝接下思恭此又經典明文互相起發

周易問答

太子問王儉曰周易乾卦本施天位而說卦云帝出乎震震本非天義豈相當儉曰乾健震動天以運動為德故言帝出震太子曰天以運動為德君自體天居位震雷為象豈體天所出儉曰主器者莫若長子故受之以震萬物出乎震故亦帝所與焉

孝經問答

儉又諮太子曰孝經仲尼居曾子侍夫孝理宏深大賢方
盡其致何故不授顏子而寄曾生太子曰曾生雖德慙
體二而色養盡禮去物尚近接引非隔宏宣規教義在
於此儉曰接引非隔宏宣雖易去聖轉遠其事彌輕既
云人能宏道將恐人輕道廢太子曰理既有位不容以
人廢言而況中賢之才宏上聖之教寧有壅塞之嫌

贊

竟陵王山居贊

升堂踐室金暉王朗亶亶大韶遙遙間賞道以德宏聲
由業廣義重實歸情深康往濠梁在茲安事遐想

碑文

太宰文簡褚彥回碑文

夫太上有立德其次有立功此之謂不朽所以子產云
亡宣尼泣其遺愛隨武既沒趙文懷其餘風於文簡公
見之矣公諱淵字彥回河南陽翟人也微子以至仁開
基宋段以功高命氏爰逮兩漢儒雅繼及魏晉以降奕

世重暉乃祖太傅元穆公德合當時行比州壤深識臧
否不以毀譽形言亮采王室每懷沖虛之道可謂婉而
成章志而晦者矣自茲厥後無替前規建官惟賢軒冕
相襲公稟川嶽之靈暉含圭璋而挺曜和順內凝英華
外發神茂初學業隆弱冠是以仁經義緯敷穆于閨庭
金聲玉振寥亮于區宇孝敬淳深率由斯至盡歡朝夕
人無間言逍遙乎文囿之圃翱翔乎禮樂之場風儀與
秋月齊明音徽與春雲等潤韻宇宏深喜愠莫見其際

心明通亮用人必猶於已汪汪焉洋洋焉可謂澄之不
清撓之不濁袁陽源才氣高奇綜覈精裁宋文帝端明
臨朝鑒賞無昧袁既延譽於遐邇文亦定昏於皇家選
尚餘姚公主拜駙馬都尉漢結叔高晉婚武子方斯蔑
如也釋褐著作佐郎轉太子舍人濯纓登朝冠冕當世
升降兩宮實惟時寶具瞻之範既著台衡之望斯集出
參太宰軍事入為太子洗馬俄遷祕書丞贊道槐庭司
文天閣光昭諸侯風流藉甚以父憂去職喪過乎哀幾

將毀滅有識留感行路傷情服闋除中書侍郎王言如
絲其出如綸恪居官次智效惟穆于時新安王寵冠列
蕃越敷邦教毘佐之選妙盡國華出為司徒右長史轉
尚書吏部郎執銓以平御煩以簡裴楷清通王戎簡要
復存於茲太始之初入為侍中曾不移朔遷吏部尚書
是時天步初夷王途尚阻元戎啓行衣冠未緝內贊謀
謨外康流品制勝既遠涇渭斯明賞不失勞舉無失德
績簡帝心聲敷物聽事寧贈太子右衛率固讓不拜尋

領驍騎將軍以帷幄之功膺庸祇之秩封雩都縣開國伯食邑五百戶既秉辭梁之介又懷寢丘之志所受田邑不盈百井久之重為侍中領右衛將軍盡規獻替均山甫之庸緝熙王旅兼方叔之望丹陽京輔遠近攸則吳興襟帶實惟股肱頻作二守並加蟬冕政以禮成民是以息明皇不豫儲后幼冲貽厥之寄允屬時望徵為吏部尚書領衛尉固讓不拜改授尚書右僕射端流平衡外寬內直宏二八之高謨宣由庚而垂詠太宗即世

遺命以公為散騎常侍中書令護軍將軍送往事居忠
貞永亮秉國之鈞四方是維百官象物而動軍政不戒
而備公之登泰階而尹天下君子以為美談亦猶孟軻
致欣於樂正羊職說賞於士伯者也丁所生母憂謝職
毀疾之重因心則至朝議以有為為之魯侯垂式存公
忘私方進明準爰降詔書敦還攝任固請移歲表奏相
望事不我與屈已宏化屬值三季在辰戚藩內侮桂陽
失圖窺窬神器鼓棹則滄波振蕩建旌則日月蔽虧出

江派而風翔入京師而雷動鳴控弦於宗稷流鋒鏃於
象魏雖英宰臨戎元渠時殄而餘黨實繁宮廟憂逼公
乃摠熊羆之士率不貳心之臣戮力盡規克寧禍亂康
國祚於綴旒拯王維於已墜誠由太祖之威風抑亦仁
公之翼佐可謂德刑詳禮信義戰之器也以靖難之功
進爵為侯兼授尚書令中軍將軍給班劍二十人功成
弗有固秉撝挹改授侍中中書監護軍如故又以居母
艱去官雖事緣義感而情均天屬顏丁之合禮二連之

善喪亦曷以踰天厭宋德水運告謝嗣主荒怠於天位
強臣憑陵於荆楚廢昏繼統之功戡亂寧民之德公實
仰贊宏規參聞神筭雖無受脤出車之庸亦有甘寢秉
羽之績乃作司空山川攸序兼授衛軍戎政輯睦既而
齊德龍興順皇高禪深達先天之運匡贊奉時之業弼
諧允正徽猷宏遠樹之風聲著之詒言亦猶稷契之臣
虞夏荀裴之奉魏晉自非坦懷至公永監崇替孰能光
輔五君寅亮二代者哉大啓南康爰登中鉉時膺土宇

固辭邦教今之尚書令古之冢宰雖秩輕於冢司而任
隆於百辟暨遂冲旨改授朝端邇無異言遠無異望帝
嘉茂庸重申前冊執五禮以正民簡八刑而罕用故能
騁績康衢延慈招后義在資敬情同布衣出陪鑾躅入
奉帷殿仰南風之高詠餐東杼一作野之祕寶雅議於聽

政之晨披文於宴私之夕參以酒德間以琴心曖有餘
暉遙然留想君垂冬日之溫臣盡秋霜之戒肅肅焉穆
穆焉於是見君親之同致知在三之如一太祖升遐綱

繆遺寄以侍中司徒錄尚書事稟玉几之顧奉綴衣之
禮擇皇齊之令典致聲化於雍熙內平外成實昭舊職
增給班劍三十人物有其容徽章斯允位尊而禮卑居
高而思降自夏徂秋以疾陳退朝廷重違謙光之旨用
申超世之尚改授司空領驃騎大將軍侍中錄尚書如
故景命不永大漸彌留建元四年八月二十一日薨於
私第春秋四十有八昔柳莊疾棘衛君當祭而輟禮晏
嬰既往齊君趨車而行哭公之云亡聖朝震悼於上羣

后恒慟於下豈惟哀纏一國痛深一主而已哉追贈太宰侍中錄尚書如故給節羽葆鼓吹班劍為六十人謚曰文簡禮也夫秉德而處萬物不能害其貞虛已以游當世不能擾其度均貴賤於條風忘榮辱於彼我然後可兼善天下聊以卒歲經始圖終式免祇悔誰云克備公實有焉是以義結君子惠沾庶類言象所未形述詠所不盡故吏某甲等感逝川之無捨哀清暉之眇默餐輿誦於丘里瞻雅詠於京國思衛鼎之垂文想晉鍾之

遺則方高山而仰止刊玄石以表德其辭曰辰精感運
昂靈發祥元首惟明股肱惟良天鑒璿曜踵武前王欽
若元輔體微知章永言必孝因心則友仁洽兼濟愛深
善誘觀海齊量登嶽均厚五臣茲六八元斯九內謨帷
幄外曜台階遠無不肅邇無不懷如風之偃如樂之諧
光我帝典緝彼民黎率禮蹈謙諒實身幹跡屈朱軒志
隆衡館眇眇元宗萋萋辭翰義既川流文亦霧散嵩構
雲頽梁陰載缺德猷靡嗣儀形長遽悵悵餘徽鏘洋遺

烈久而彌新用而不竭

連珠

賜連珠

蓋聞王佐之才雖遠豈必見採於當時凌雲之氣徒盛
無以自致於雲間是故魏人指玉於外野和氏泣血於
荆山

哀策

高帝哀策文 並序

降階執禮泣血纏心感客臺之罷御哀恭館之不臨仰
神儀而邈絕視區物而淒陰俾茲良史敬修舊則敢圖
鴻規式揚至德其辭曰

靈源遙裔肇惟商丘聖功寧夏賢識歸周我皇踵武超
冠前猷美風允迪德音孔修月准敷仁日精表孝則地
均和體天合炤外宏三至內隆七教水祀將傾乾維晦
象韋弁長襲鼓磬屬響聲化已淪政刑遂往國圖靡緝
民規載奕康世以德撥亂資武威以雷霆潤以風雨六

術孔昭四義克舉自東徂北遐方即叙功被河濟化隆
江漢帝謨仰式王維竹幹改步藩屏來登翼贊綢繆總
章因循陽館昔在保衡君違斯政爰茲博陸亦鑒靈命
效昏以忠登明資敬義煥金石功昭舞詠蠢爾荆漢悖
亂人經謀連樞禁兵接神垺禦姦以惠禦宄以刑獻捷
宗寢飲至王庭政教雲行徽猷天造山鑑紫璇苑茂朱
草玉檢騰暉金繩薦寶天鏡既穆地維既肅遐邇一體
表裏褫福乃眷斯民昧旦抒軸興文偃武績禹舊服所

向惟簡所保惟賢居尊彌約無善不延膠章載緝風軌
克宣上動清儀下達玄泉聽覽閒日應物餘景怡慮以
文棲心以靜鴻章晨映徽言夕永迹庇區服情深箕頴
萬寓飡和百神受職梁甫欣儀云亭望式輔德伊何奄
捐民極嵩嶽長傾宸暉斯旻機炤惟寂達鑒靡傷慎終
敬始知微知章立言垂範王潤金相瞻仰遺式哀結流
霜旋玉軼之皦鏡動雲旗之逶迤振哀茹於八極響清
蹕於咸池顧應夜而稍遠視機衡而長離風遲遲而懷

暮日憺憺其若垂感衣冠於喬岳追弓劍之在斯悼丁
年之薄祐訴窮心於兩儀

皇太子妃哀策文

肇惟初職芳猷夙就翩翩禮園徘徊樂園視秋齊明方
春等茂伊宋之季天衢薦阻咨我儲貳締緡江許衛女
事齊樊姬贊楚美著嬪嗣徽音踵武數盈則反否極斯
昌肅膺靈命經緯三光往儀衡館來式椒堂訓組咸事
象服有章八演仰則六幽望景悠悠草昧如何不永方

方委曜先秋落穎世有遺塵庭無餘影嗚乎哀哉遵三
兆之嘉日迨九筮之靈期澄金波而映鑾旂命飛廉而
拂瓊輜揚清笳於漢表動嘶挽於雲基

詩

侍皇太子釋奠宴

禮惟國幹義實民端身由業澡世以教安金鎔乃器水
術伊瀾漸芳則馥履冰固寒瞽宗務時類宮善誘咨此
舍生躋彼仁壽淳移雅闕厯茲永久遊藝莫師獨學誰

友三兆戒晨八鸞警旦風動嵩宮雲棲參館禮邁仁周
樂超英漢神保爰格祝史斯贊鬱鬯既終德馨是與降
寃上庠升宴東序槐宰金貞藩維玉譽時彥萃萃國胄
楚楚

侍太子九日宴玄圃詩

明明儲后沖默其量徘徊禮樂優游風尚微言外融幾
神內王就日齊暉儀雲等望本茂條榮源澄流潔漢稱
間平周云魯衛咨我藩華方軼前軌秋日在房鴻鴈來

翔寥寥清景靄靄霜草木搖落幽蘭獨芳眷言淄苑
尚想濠梁既暢旨酒亦飽薇猷有來斯悅無遠不柔

贈徐孝嗣

婉婉遊龍載遊載東靡靡行雲並躍齊蹤無類不感有
來斯雍之子云邁嗟我莫從歲云暮止迷職戒行崇蘭
罷秀孤松獨貞悲風宵遠乘鴈晨征撫初遐想念別書
情

春日家園

徙倚未云暮陽光忽已收義和無停晷壯士豈淹留冉

冉

一作
荏苒

老將至功名竟不修稷契匡虞夏伊呂翼商周

撫躬謝先哲解紱歸山丘

春詩二首

蘭生已匝苑萍開欲半池輕風搖雜蘼細雨亂叢枝

其二

風光承露照霧色點蘭暉青莢結翠藻黃鳥弄春飛

春夕

露華方照歲雲彩復經春虛閨稍疊草幽帳日凝塵

後園餞從兄豫章

茲夕竟何夕念別開曾軒光風轉蘭蕙流月泛虛園

失題

方軌並茂追情彥輔柔亦不茹剛亦不吐

南郊樂歌

高德宣烈樂

饗帝嚴親則天光大鳥奕前古榮鏡無外日月宣華卿

雲流霽五漢同休六幽成泰

太廟樂歌

高德宣烈樂

悠悠草昧穆穆經綸乃文乃武乃聖乃神動戡危亂靜
比斯民誕膺休命奄有八紘握機肇運光啓禹服義滿
天淵禮昭地軸澤靡不懷威無不肅戎夷竭歡象來致
福偃風裁化暉日敷祥信星舍曜拒草流芳七廟觀德
六樂宣章惟先惟敬是享是將

穆德凱容樂

太姒嬪周塗山儷禹我后嗣徽重規疊矩肅肅闕宮翔
翔雲舞有享德馨無絕終古

明德凱容樂

多難固業殷憂啓聖帝宗纘武維時執競起柳獻祥百
堵興詠義雖祀夏功符受命遠無不懷邇無不肅其儀
濟濟其容穆穆赫矣君臨昭哉嗣服允王惟后膺此多
福禮以昭事樂以感靈八簋陳室六舞充庭觀德在廟

象德是形四海來祭萬國咸寧

齊白紵辭

陽春白日風花香趨步明月舞瑤裳情發金石媚笙簧
羅袿徐轉紅袖揚清歌流響繞鳳梁如驚若思凝且翔
轉盼流精艷輝光將流將引鴈雙行歡來何晚意何長
明君馭世永歌昌

漢魏六朝百三家集卷七十五